

*MENSAGEM PAPA FRANCISCO NIAN  
BA 52º DIA MUNDIAL  
ORASAUN BA VOCASAUN SIRA*

(26 de Abril de 2015 - IV Domingo de Páscoa)

*Tema: «Êzodu, nudar experiênciá fundamental ba vokasaun*

(Tradusaun: Me. TMJ, FdCC)

*Hau nia doben maun, bin alin sira!*

Domingu Daha'at Páscoa nian, apresenta mai ita imajen Bibi Atan Diak [Bom Pastor] nian, Nia nebe konhese nia bibi sira, bolu sira ho sira nia naran, fo han ba sira, no bali sira. Liu ona tinan 50 resin iha Domingu ida ohin, mak ita selebra Loron Mundial orasaun ba Vokasaun sira. Loron ida ohin, fo hanoin mai ita kona ba importansia atu harohan, atu nunee «to'os nain – nudar Jesus dehan ba nia eskolante sira – bele haruka serbisu nain ba nia to'os» (Lk. 10, 2). Jesus fo ordem nee iha kontekstu *envio missionário*: alein de haruka apostolu nain sanulu resin rua, nia bolu tan eskolante nain hitu nulu resin rua hodi haruka sira nain rua-rua ba misaun. (cf. Lc 10,1-16). Tamba nee se Kreda nee «nia natureza rasik nudar missionária» (Conc. Ecum. Vat. II., Decr. *Ad gentes*, 2), vokasaun sarani so bele moris deit hosi esperiencia misaun nian. Nunee, rona no tuir Kristu Bibi Atan diak nia lian, husik ita nia an atu atrai ba Nia no husik Nia mak bali ita, no konsagra ita nia moris rasik ba Nia, signifika katak fo lisensa ba Espiritu Sant atu introduz iha ita, dinamismu missionariu ida nee, hodi hamoris iha ita nia laran, dezeju no korajen ida nebe buras ho ksolok, atu oferese ita nia an hodi gasta vida nee ba Maromak Reino nia Kauza.

Oferese an rasik iha atitude misionaria ida nee so bele realiza duni se karik ita iha kapasidade atu sai hosi ita an rasik. Tamba nee, iha loron mundial orasaun ba Vokasaun ba dala 52 nee, hau hakarak tebes atu reflète kona ba «êzodu» ida, partikular liu tan, mak vokasaun nee, ou diak liu tan, ita nia nia resposta ba vokasaun nebe Maromak fo mai ita. Wainhira ita rona lia fuan «êzodu», ita nia hanoin nee mai kedas istoria maravilha nia hahú [inisiu]; kona ba domin entre Maromak ho Nia povu Nia oan sira nian, istoria ida nebe liu hosi moris nakonu ho hahalok dramátiku atan nian iha rai Ejiptu, Moisés nia vokasaun, povu nia libertasaun, no sira nia viajen ba Terra prometida. Livru Daruak Biblia nian – Êzodu – nebe haktuir istoria ida nee, sai hanesan parábola ida ba istoria salvasaun tomak, no mos nudar dinámika fundamental ida ba fiar sarani. Los duni, sai hosi moris atan nian, hosi ema tuan nian ba fali moris foun iha Kristu, nudar obra salvasaun nian nebe realiza iha ita, liu hosi fiar (Ef 4, 22-24). Passajen ida nee, los duni nudar «êzodu» tebes nian, nia nudar dalan ida ba klamar sarani sira nian, no mos Kreda tomak nian, nudar orientasaun disiziva hosi buat moris tomak nian ba ita nia Aman.

Iha abut vokasaun sarani ida-idak nian, iha movimentu fundamental esperiencia fiar ida nee: fiar (crer) signifika katak husik an rasik, sai hosi nia komodidade (*kenyamanan*) no nia rigidez rasik (kekakuan) atu bele centra ita nia moris iha Jesus Kristu, hanesan Abraão abandona nia rain rasik, hahú la'o dalan hodi konfia deit iha Maromak, hanoin katak Maromak sei hatudu dalan atu too iha rai foun. «Saída» ida nee, ita LA bele hanoin fali hanesan despreza moris rasik, despreza sentimentu an rasik, ka despreza ema nia moris; au kontrariu, se mak hahú ona dalan atu tuir Kristu, sei hetan

moris ida nebe nakonu liu tan (abundância), hodi hatúr buat hotu nebe nia an nian nee iha Maromak no iha Nia Reino nia dispozisaun. Hanesan Jesus dehan, «ema hotu nebe husik sira nia uma, maun-alin, aman, inan, oan sira, ka to'os tamba Hau Nia Naran, sei simu atus ida liu fali, no sei hetan Moris rohan laek nudar liman rohan» (Mt. 19, 29). Buat hirak nee hotu nia abut klean liu mak Domin. De faktu, vokasaun sarani nee liu fali buat hotu, nudar makbolun ida domin nian nebe atrai no haruka hikas fali, laos deit ba an rasik, nia mos halo ema la centra ba an rasik deit (decentraliza), provoka «hau nia êxodo permanente ida nebe taka ba hau an rasik deit, hodi lori ba hau nia libertação iha hau nia dom rasik, no liu hosi dalam ida nee, lori hau ba hasoru hau nia an rasik, no liu tan ida nee, atu deskobre Maromak » (Bento XVI, Carta enc. *Deus caritas est*, 6).

Esperiensia Êzodu nian nudar paradigma moris sarani nian, liu-liu ba ida nebe simu vokasaun spesiasl atu dedika an ba knar Evanjelhu nian. Esperiensia nee konsiste iha attitude konversaun no transformasaun ida nebe hafoun nafatin, atu hela metin nafatin iha dalam ida nee, atu liu hosi mate ba moris, nudar ita selebra iha liturjia tomak: nee mak dinamismu paskua nian. Fundamentalmente, hosi Abraão nia bolu to'o iha Moisés nian, hosi Israel nia dalam peregrinasaun iha rai fuik maran to'o iha profeta sira nia haklaken ba konversaun, to'o iha Jesus nia viajen missionaria nebe ba kulmina iha Nia mate no moris hias, vokasaun nee mak nafatin nudar Maromak nia asaun, nebe halo ita sai hosi ita nia situasaun inisial, liberta ita hosi forma oin-oin moris atan nian, fokit ita sai hosi ita nia rutina no indiferensa, hodi projeta ita ba ksolok moris komunhaun ho Maromak no ho maun-bin alin sira. Tamba nee, hatán ba bolu Maromak nian ida nee, katak husik atu Nia halo ita sai hosi ita nia estabilidade falsu sira atu hahú dalam ida ba hasoru Jesus Kristu, nudar ita nia meta dahuluk no ikus liu iha ita nia vida no ita nia felisidade.

Dinâmika Êzodu nian ida nee la koalia deit ba ema sira nebe Maromak bolu, maibe mos kona ba aktividade missionária no evangelizadora Kreda tomak nian. Nee katak, sai fiel tebes duni ba nia Mestri, nunee hanesan Kreda ida nebe "Sai ba liur" [*Igreja em saída*], la preokupa ho nia an rasik deit, ho ninia estrutura no nia konkista ka suksesu sira, maibe pronto atu sai, atu bok an, atu hasoru Maroma nia oan sira iha sira nia situasaun real hodi sai laran sadia ba sira nia kanek sira. Maromak sai hosi Nia an rasik iha dinâmika Trinitaria domin nain nian, halo konta kona ba nia povu nia terus, hodi intervem atu liberta nia (Ex. 3, 7). Dalam atu aktua no moris ida nee, sai mos Kreda nia bolu ida: Kreda nebe haklaken, sai ba hasoru ema, haklaken lia fuan Evangelhu nebe liberta, tau matan ba kanek klamar no isin nian ho Maromak nia grasa, foti sa'e sira nebe kiak no sira nebe presiza liu.

Maun alin inan feton sira nebe hau hadomi,

êzodu libertador ida nebe lao ba hasoru Kristu nia maun alin sira, sai mos nudar dalam ida atu komprende ema lolos, no atu sai boot hanesan ema humanu no ema social iha istoria. Rona no simu Maromak nia bolu, laos kestaun privada ka intimista nebe iha deit hau nia laran neba; nebe ita bele konfundi ho emosaun momentu ida nee nian; maibe, nee nudar kompromisu konkretu ida, real [tebes duni] no total, nebe haku'ak ita nia ezistensia tomak, no halo ita fo an atu serbisu hodi hari Maromak nia reinu iha mundu. Tamba nee, vokasaun sarani, nebe hetan nia abut iha ita nia kontemplasaun Aman Maromak nia fuan, dudu ita simultaneamente atu halo kompromisu ida nebe solidariu, atu bele liberta ita nia maun alin sira, liu-liu sira nebe kiak liu. Jesus nia discipulu iha fuan ida nebe nakloke ba horizonte ida rohan laek, no ninia intimidade ho Maromak, nunka sai hanesan eskapa [halai sés] ida hosi moris no hosi mundu, maibe au kontrariu, "nia fundamentu nee hola forma komunhaun missionaria» (Exort. Ap. *Evangelii gaudium*, 23).

Dinâmica Êzodu nian nebe lori ita ba hasoru Maromak no ema sira nee, hakonu ita nia moris ho ksolok no signifikadu. Hau hakarak atu dehan liu-liu ba sira klosan, tamba sira nia idade no vizaun ba futuru nebe nakloke iha sira nia oin, atu hatene sai disponivel no jenerosu. Dala ruma, buat nebe incógnitu no preokupasaun sira kona ba futuru no inserteza sira nebe afekta imi nia moris lor-loron, iha risku nebe paraliza imi nia impulsu sira, hanehan imi nia mehi sira, too pontu atu imi hanoin katak la presiza atu kompromete an ka Maromak ita nia fiar sarani nian kontrola imi nia liberdade. Au kontrariu, doben foin sae sira! Imi labele tauk atu sai hosi imi nia an rasik hodi hahú halo dalan. Evanjelhu nee Lia fuan nebe liberta imi, transforma no halo imi nia moris sai furak liu tan. Diak tebes husik ita nia an atu Maromak fo surpresa mai ita hodi bolu ita, simu nia Lia fuan, hatur ita nia ain iha Jesus nia ain fatin, iha adorasau ba Mistériu Maromak nian no iha dedikasaun jenerosa ba ema seluk! Ita nia moris sei sai riku liu tan no haksolok liu tan.

Virgem Maria, modelu ba vokasaun hotu-hotu, la tauk atu pronunsia nia «*fiat*» ba Maromak nia bolu. Nia akompanha ita no bali ita. Ho nia aten brani fiar nian nebe jeneroza, Maria hananu ksolok 'sai hosi Nia an rasik', no konfia iha Maromak, ninia planu sira nia vida nian. Ita hakbesik ba nia, hodi husu atu ita bele sai disponivel nafatin ba Maromak nia hakarak mai ita ida-idak lor-loron, atu haburas iha ita, dezeju atu sai no la'o [sair e caminhar] ho kuidadu [solicitude], ba hasoru sira seluk (Lk. 1, 39). Ita nia Inan Virgem proteje ita no harohan daet mai ita hotu.

*Vaticano, 29 de Março – Domingo de Ramos – de 2015.*

Franciscus PP.